

Il teater sur dal teater

Lönch nu d'eira cler, scha la scoula da S-chanf po fer ün teater da finischiun quist an. Pür illas ultimas trais eivnas ho la mnedra da scoula Elvira Pünchera scrit il text ed ils scolars haun fat prouvas fin l'ultim mumaint. Il schligerimaint ed il plaschair da tuot ils partecipos es grand.

GIANNA DUSCHLETTA

Avaunt bundant ün mais ho il Cussagl federel comunico ils prossems pass illa schlucheda a regard il coronavirus. In quel mumaint ho Elvira Pünchera, magistra e mnedra da la scoula primara S-chanf, decis da fer il teater per la finischiun da l'an da scoula.

«Fin lo nu vaivi però fat ünguotta. Eau füss steda fich frustreda d'avair scrit e zieva na pudieu fer il teater», disch Elvira Pünchera, chi scriva daspö ans svesa ils teaters per sieus scolars. Cur cha d'eira però cler, cha'l teater po avoir lö, ho la magistraglia scrit ün concept, il cussagl da scoula l'ho sancziuno, ed ils genituors haun gieu temp tschinch dis per annunzcher a lur iffaunts pel teater. Pür la prüma fin d'eivna da gën ho Elvira Pünchera lura scrit il text.

Illas seguaintas duos eivnas e mez haun ils scolars imprains lur text, gieu bgeras prouvas da teater, tuot sper lur normel minchadi da scoula. Las scenas e prouvas d'eiran coordinedas in pitschnas gruppas, que do be pochs mumaints cha tuot ils scolars sun sül palc. In marculdi bunura, il di aunz la premiera, ho l'actur Lorenzo Polin visito la prouva da teater ed ho do tips, trics

e tschegns als giuvens actuors. «Que ho auncha do ün ultim stumpel. A sun be finessas, ma que fo listess üna differenza», uschè Elvira Pünchera.

Il teater «Il fantast»

Il teater consista our da trais parts, la prüma part d'eira planiseda per il teaterin da Chalandamarz. Quella ho la magistra transcrit, per ch'ella s'affo cul rest. In quista part fo il «RTR» ün'emischiun sur da la scoula primara da S-chanf. Lur visita es düraunt il mais favrer, cur cha'ls scolars e la magistraglia sun be preparativs per lur teater cumünaivel a la fin da l'an da scoula. Illa seguonda part, «Il temp dal lockdown», proclama il Cussagl federel il stedi d'urgenza. Las scoulas vegnan ser-

redas, la vita publica resta salda. Als 27 meg lura il grand schligerimaint: a partir dals 6 gën sun darcho pussiblas occurrenzas fin a 300 persunas cun ün concept da protecziun. Ma che significha que pel teater da la scoula da S-chanf? Scu cha ün dals protagonistis disch: «Nu cjararost sves brich cha quels rivan da preparar ün teater cun tuot quists tracagnottels infra duos eivnas e mez?» Illa terza part dal teater esa cler, cha als scolars esa reuschieu da metter in peis infra quel cuort temp lur teater da finischiun. In quista part as po observer il minchadi scolastic d'ün scolar chi ho il cho illas nüvlas - dimena ün fantast.

Elvira Pünchera disch, cha il text dal teater, scu eir l'ideja, sajan naschieus

pür al cumanzamaint dal mais: «Al cumanzamaint da l'an da scoula vaivi in testa be la terza part, be quist fantast. Ma uossa stögli dir, quist am plescha bger meglider.»

Potenzial dals scolars

Cun que cha'ls scolars da la scoula primara a S-chanf sun adüsos da giuver a teater già in scouline, sviluppan els tres que ün fich bun sentimaint pel discuorer e pel palc. Ils intermezzos musicals, accompagnos cun clavazin, chaunt, trumbetta e flötas, scu eir ils passagis da text in inglais, frances, tudas-ch e taliaun muossan il potenzial enorm cha iffaunts da tschinch fin dudesch ans haun vairamaing. Elvira Pünchera e las magistras chi haun güdo a metter in

peis il teater sun fich satisfattas cun lur scolars.

Eir ils iffaunts sun furtünos, scu cha üna matta quinta: «Nus essans fich cuntaints cha pudains fer il teater, e quist'eivna nu vaivans bod üngünas lezchas.» Il proget spontan es dimena reuschieu, il schligerimaint es grand per magistras, scolars e genituors. L'eivna chi vain vo tuot la scoula primara da S-chanf in viedi da finischiun culs raps da la collecta. Avaunt ün pèr mais nu vess üngün ris-cho da dir, cha l'an da scoula finischa uschè bain per els.

L'ultima rapreschantaziun dal teater «Il fantast - trais purtrets» da la scoula primara S-chanf ho lö quista saira a las 20.00 illa sela da gimnastica da S-chanf.



I'l töch «Il fantast - trais purtrets» proclama il Cussagl federel il stedi d'urgenza causa il coronavirus. Ma che vuol que dir per il teater da finischiun da la scoula da S-chanf?
fotografia: Gianna Duschletta